

ENFOQUE SOCIAL

ARUBA SU YIU : ROBERT JEANDOR, CARERA MUSICAL UNICO. skirbi pa Juby Naar:

Otro siman, nos ta drenta den e luna di "**Robert Jeandor**", e luna di homenaje na Robert, **40 añ ariba escenario**, como artista, cantante, musico, compositor y arreglista internacional, "**Aruba su yiu**" ..E prome Arubiano cu a canta cu Sonora Matancera cu ta reconoci internacionalmente, y cu a sali tambe den e buki di historia di **Sonora Matancera** cu tur hende cu a participa cu e orquesta aki.

Algun siman pasa mi a menciona di lo bini cu un relato riba trayectoria di Robert, pasobra awendia ta masha poco di nos hobennan conoce e historia aki di e musico cu a logra exitonan mas grandi internacional cu cualquier otro artista di e islanan ABC.

Mi a sigui trayectoria di Robert, lesa di su logronan, conversa cu artistanan di afo, conversa cu Robert na hopi ocasion, scucha y afirma hopi di e ponencianan

ricibi den transcurso di añanan, y hasta diamars ultimo, na entierro di Cecil Grovell, ainda mi a busca algun afirmacion, prome cu por a yega na formula e relato aki, pa aki na Aruba nos hendenan por a sa exactamente kico **Robert Jeandor** ta pa nos isla riba tereno musical y pakico e homenahe na juli ta na su lugar y bon mereci.

Un homenahe cu mester a bini ayera caba .For di mucha caba mi tabata mey mey di e Jeandornan, tempo di amistad masha estrecho entre nan tata -awe difunto- Francisco "**Chico**" y mi tata, awe difunto.Chico, un homber cu a "**goberna su familia**" cu man estricto di disciplina, pero cu tabata e motor tras di Robert su desaroyo como musico.Tempo Robert tabata tin 5 pa 6 añ a y cu na **Radio Kelkboom** tabata toca danzon cubano, son montuno, guaracha etc.

Robert tabata bati man riba ritmo di danzon cu e tabata gusta masha hopi.Su tata cu a ripara cu Robert tabata gusta e ritmo ey a encurasha Robert pa sigui. E mes tabata un guitarista masha conoci y cu a yega di toca tambe cu **Julian Coco** cu a bira un guitarista di taya mundial. E rumannan mayor, **Frank y Percy** tabata tocadornan di guitarra, y tabata toca cu nan amigonan, entre otro **Tito Flores** -awe difunto-, cu a cuminsa den musico cu **De Trupialen**.

Robert mes no a cuminsa cu guitarra. El a cuminsa na toca cuarta y ta despues a pasa pa guitarra. Su tata hasta a traha un tablero pe, pinta cu man riba carton, mustrand e notanan y con pa pone dedenan etc.Musiconan di hotelnan a cuminsa bin cas, y Robert a cuminsa conoce nan y a sigui nan movecionnan y practica pa riba su mes busca pa bay dilanti.

Di su tata tambe el a haya un schrif cu akkoordnan di cuarta (venezolano) y a siña di esaki Tabata na 1963 cu su ruman Frank a hibe pa bay toca cu **Blancas Palomitas di Tanki Leendert**, grupo di aguinaldo e tempo ey bao direccion di **Severiano Luidens** (awe difunto) y su yunan **Evelien y Jossy Luidens** cu a cuminsa cu **Blancas Palomitas..**

No a dura mucho cu **Albert Dieffenthaler** a bin cas papia cune pa e bay television cu Albert pa toca tempo cu Tele Aruba a habri. Robert a toca cu Albert cu tabata riba piano y Robert cu cuarta..Despues Robert a pasa pa **Alma Solis** cu Elvy "**Vi**" Maarten cu tocadornan y cantantenan, **Chomon Boekhoudt, Pedro Arends, Percy Jeandor y Robert**.Despues a drenta **Chemito Kelly**.

Robert, manera un "**sardin**", a keda landa mey mey di "**bayenanan**" musical den e oceano musical aki.El a toca tambe cu **Doodle Sofia y Fabian Willems**, a toca den programanan di **Cultura y Educacion**, programa di television di **Ronny Marrugg,(Cocktail Musical)** di **Tico Kuiperi (Show Time)** -awe difunto-, y di **Janchi Tromp (Lo Exclusivo)** na television.

El a toca na **Cactus Inn**, pabao di **Magic FM, Bali** cu tabata dilanti **Renaissance hotel** di awe, **Trocadero Bieu** cu tabata unda awe tin e **Crystal Casino, Basiruti bieu, POVA bieu**, cual tabata unda awe tin **Holiday Inn, na Strand hotel** cu a bira **Talk of the Town** y na **Manchebo**.El a sigui cu **Los Juveniles** cu **Vito Oduber** como manager, cu **Vicente Kelly**, y hopi musico cu a keda cambia

Mas o menos 12 aña el a keda cu **Los Juveniles** cu 13 aña a keda dirigi pa Vito Oduber. Aruba a haya bishita di varios grupo di fama mundial e tempo ey, manera **Cortijo y su Combo**, **Gran Combo**, **La Dimension Latina**, **Tipica 73**, **Larry Harlow**, **Cuco Valoy**, y varios grupo di salsa y merengue. Nan a mira Robert y bisa cu e tin cualidad pa traha internacional pasobra "**Aruba ta chiquito pa Robert**".

Johnny Ventura a papia cune, y bise cu e tin stem bon pa **Gran Combo**. Tempo cu **Andy Montañez** a bay laga Gran Combo, el a canta cu Gran Combo cu a bin buske despues como cantante fiho.. Tabata tin problema di visa cu a tarda y **Gran Combo** a busca **Jerry Rivas**. Esaki tabata un chance grandi cu Robert a perde. **Johnny Ventura** e ora ey a dicidi di bay cu Robert..

Larry Harlow, tempo ey cu **Fania All Stars** tabata den su gloria, kier a bay cu Robert pasobra el a perde **Ismael Miranda**. **Larry Harlow** tabata tin **Nestor Torres** cu no tabata sigur cu **Nestor** y kier a bay cu Robert, pero **Johnny Ventura** a bay cu Robert.

El a hinca Robert den **Los Hijos del Rey** cu tabata e grupo mas pega na Santo Domingo. Robert a haya longplay di **Los Hijos del Rey** di un amigo arubiano pero a tira e LP un banda y no kier a toca e longplay pasobra e no tabata cantante di merengue. Su ritmo preferi tabata salsa

Pero ora cu **Johnny Ventura** a conte di e grupo y su trayectoria, el a dicidi di scucha e longplay, y ta net cu e grupo aki cu el a nenga di scucha su longplay, el a bay canta internacionalmente.. Na RCA ora a tende cu Robert ta bay afo, e hendenan a bisa: "**Ay ora e hendenan aki bay di Aruba, nan nan ta lubida riba bo.**".

Robert no a perde speranza, el a keda cu su fe di yega na toca unda **Fania All Stars** y artistanan grandi di salsa y merengue a toca. E tabata prepara su mes, practica y move etc. den ensayonan na cas, caminda hende lo a kere cu ta loco e ta den camber. Na Januari 1979 trahando na **Antillian Mercantile** (Unicon bieuw) patras di **Royal Plaza**, **Johnny** a yame pa e bin otro siman

Tabata problema di trabao pe, pero su hefenan y compañeronan a apoye y sostene. Cu 8 aña di trabao sin nunca a tuma vacacion, nan a lague bay cu puesto habri Robert a yega Sto. Domingo diamars anochi, train diarazon mainta, y tabata un cancion di Los Juveniles "**La negra salsera**" pero cu areglo nobo, y merdia el a bay toca na television unda el a bin conoce e otro tocadornan den "El show de Mediodia".

Radionan a cuminsa comenta di Robert, y net ora cu e mester a bolbe Aruba. Pero mal tempo a pone cu airport a cera y Robert mester a keda mas dia y a bay canta tur caminda cu e banda **Los Hijos del Rey**, e weekend ey. E arubiano mey mey di Dominicanan y puertorriqueñonan a cuminsa haya elogio y admiracion. Robert a keda 2 1/2 aña cu e banda. Su cancion salsa "**Puchula**" a keda 7 luna riba hit-parade y sali salsa di aña.

E prome cancion internacional graba di Robert tabata "**El Viento**" otro salsa y esun cu a pega masha duro mes cu a yega na hiba **Los Hijos del Rey Madison Square Garden 3, 4** biaha na New York tabata "**yo me dominica- nizo**". Cu **Hijos del Rey** el a bay Madison como 6 biaha y cu **Johnny Ventura** mas o menos 8 biaha.

El a canta den e **Madisson Square Garden** grandi di New York, di 24 mil hende y e parti yama **Felt Forum** cu ta carga 15 mil hende. Den e **Big**, e grandi, el a canta 5 biaha y den e chiquito mas o menos 9 biaha. El a biaha pa varios pais di Europa cu **Los Hijos del Rey** y despues di problema di e banda na Puerto Rico, ni 20 minuut despues **Wilfrido Vargas** a yama Robert pa e traha cu Wilfrido.

Roberto Roena, e ex bongocero di Fania All stars, e mes madrugada a yama tambe pa Robert traha cune den su banda. Robert no a bay cu Wilfrido ni cu **Roena**. Papito Jalajala (di e cancion **Jalajala**) tabata kier pa Robert keda Puerto Rico, pero Robert a dicidi di keda cu **Johnny Ventura** cu e no kier a defraudar- como gratitud- y cu a yama Robert tambe. Robert a bin Aruba unda su señora a duna luz y **Johnny Ventura** despues a yame na 1982.

Den mas o menos 10 luna Robert tabata biaha pa Santo Domingo na varios ocasion, te cu finalmente el a keda Sto. Domingo cu **Johnny Ventura**. Cu **Johnny Ventura** Robert tabata tin exitonan grandi y a biaha especialmente pa Merca tocando tur rond di Merca. El a toca den **Coliseo Roberto Clemente** na Puerto Rico tambe, den **Alto de Chavon y Palacio de Deportes** na Santo Domingo, **Stadion Olimpico, Sto Domingo**, den **Carnegie Hall** na New York, den **Radio City Music Hall**, den **Madisson**, den stadion di **Hollywood** unda tur artista grandi ta toca, den e **centronan di mas grandi na Miami**, "**Ta. Miami**", unda **Willie Colon**, **Johnny Ventura**, **Conhunto Quisqueya** a toca hunto.

El a toca na **Viña del Mar** na Chile, (e di dos arubiano,-- despues di **Julio Euson**)/ Aki e banda a gana Antorcha de Plata. Na Colombia a gana **Congo di Oro** cuatro biaha cu **Johnny Ventura**, tocando tambe na Barranquilla den **Coliseo**, na **Bogota**, **Medellin**, **Cali**, y varios lugar mas na Colombia. Na Colombia el a pega e cancion "**Rebecca**" cual tabata riba e LP di **Johnny Ventura**, "**Flying High**". E cancion a cosecha exito grandi na Panama tambe.

Na Panama "**Rebecca**" tabata asina grandi cu Johnny Ventura a manda busca Robert na Sto. Domingo pa sea como sea, e percura pa e ta na Panama prome cu 6 or atardi, apesar cu Robert tabata riba cama cu operacion di breuk. Drumi den avion riba asientonan di patras el a bay Sto. Domingo, Miami, Panama.

Na Miami e empresario di fama Nestor Zavala a topa cune y a percura pa e por a pasa su periodo di estadia mas comodo y prepara tur cos pe pa sigui su biahe. Na Panama, Robert nunca a pensa di lo mira asina tanto hende na aeropuerto, entre nan periodistanan, y fanaticonan di "**Rebecca**" pa ricibi'e.

E anochi ey,-- segun tradicion di Panama,-- asina cu a toca e **tema mas pega**, cual a resulta di ta **Rebecca**, tur hende ta hisa **paraplu** y esey ta loke Robert a logra aki. Cu Johnny Ventura el a toca riba barco, tambe. Robert a acompaña **Celia Cruz** mas o menos 10 biaha como bahista y como corista.

El a acompaña **Johnny Pacheco** como corista schouder pa schouder, cosnan cu no ta tur artista di Aruba por logra asina asina. Robert tabata e prome cantante di tumba di carnaval cu a gana e concurso di tumba 3 biaha tras di otro. Robert a siña hopi cerca **Rufo Odor**, unda el a siña den canto, y siña musica, lesando musica. **Eddy Bennet** awe difunto tambe tabata un maestro di Robert Jeandor y a contribui den desaroyo musical di **Robert Jeandor**.

Un di e expresionnan cu casi ningun hende sa na Aruba tabata tempo cu **Angel Job**, awe difunto, tabata tin su programanan di television na Corsow, **Show di Job**, cu a bisa Johnny Ventura "**si Robert Jeandor triunfa, boso tene y no lague bin Aruba, ami ta paga su pasashi y ni boso ni Robert ta saca un cent**". <M>No a dura mucho cu Johnny Ventura a pone Angel Job na altura cu "**el hombre triunfo**" y Angel Job a manda pasashi pa Robert bay Santo Domingo.

Otro persona cu Robert mester tin den su curiculo menciona, ta **Lhando Garcia**, "**el sanito**" cu a forza pa Johnny Ventura papia cu Robert, bisando e: "**bin wak un guy cu ta canta na Aruba dia bo bin aki**," y Johnny a yega Aruba y a bay scucha Robert y Lhando ta esun cu a bisa Johnny Ventura "**wak kico bo haci, pero bay cu e guy aki**".

Robert sigur tampoco por laga afo **Billy Bikker** cu a pone Robert Jeandor canta cu **El Gran Combo**, tempo cu Gran Combo a bini Aruba cu su exitonan "**El barbero loco**", "**Ojas blancas**", "**Pin pin**" y a toca den Club Caiquetio. Di e artistanan grandi internacional e no por keda sin menciona nunca number di **Bobby Valentin**, cu mester a bini Aruba pa festival di Jazz cu otronan di Fania, manera **Johnny Pacheco**, **Barreto**, y **Giovani Hidalgo**.

E tempo ey Roberto Roena no por a bini debi na problema cu husticia y Bobby Valentin a haya problema pa bini Aruba cu vuelo.. Bobby a menciona di su problema y a recomenda pa nan acerca Robert na Aruba. Johnny Pacheco a manda busca Robert urgentemente.

Bobby Valentin tabata e persona cu a pone tur placa pa Robert por a saca su prome LP internacional como Robert Jeandor. Bobby tabata e productor ehecutivo di e LP. Mi ta corda ainda con Robert na su cas a ricibi e yamada di Johnny Pacheco, y a contesta: "**Sapato Viejo**" kico a pasa?" y mes ora mas o menos 2 or Robert cu mi a bay pa e por a ensaya cu e seisnan di **Fania** den Mansur Ballpark

Por corda ainda con Aruba tabata tin su orquesta "**All Stars di Aruba**" y no a inclui Robert den e "**All Stars**", pero porta di mas grandi den America Latina a habri pa Robert, e porta di Salsa cual tambe a bin topa cu un candal di mala suerte. Robert a ensaya cu e 6 nan di **Fania All Stars**, y varios musico Arubano cu a haya chance pa dreña stadion toch, a pesar cu a prohibi hende di dreña, a keda boca habri.

E candal a cera 6 or atardi pa Robert pasobra Bobby Valentin a yega Aruba toch y a ocupa su puesto den e agrupacion. Importante aki tabata cu Robert Jeandor a wordo acepta entre esnan mas grandi di salsa, **Fania All Stars**, un arubiano cu a wordo busca na Aruba debi na e number internacional cu e tabata tin.

Robert tin premionan e logronan grandi di salsa y merengue cu a pega. Disconan di Golden Series di Cartagena, disconan di oro di Tommy Olivencia. y cu Robert a forma parti como areglista y bahista "**25 Aniversario**". Robert a graba riba CD cu **Juan Luis Guerra**, cinco produccion y a gana **Grammy** americano cu "**Bachata Rosa**".

El a graba como corista, bahista y maraca cu Juan Luis Guerra. Nunca Robert tabata kier a toca cu Juan Luis Guerra. E por a toca cu Juan Luis Guerra na Venezuela pero no por a bay debi na tantísimo trabao di produccionnan den studionan dominicano, y ta net durante e gira ey Juan Luis Guerra y su integrantenan a haya desgracia tambe. Den henter e relato aki no a menciona e mas di mil grabacion cu Robert a haci den studionan na Sto. Domingo y Puerto Rico, pa cantidad di orquesta y artistanan grandi, como tecnico di studio, corista, bahista y den percusion, locual lo a haci e relato aki hopi mas largo ademas di otro puntonan cu mi no a menciona di su trayectoria debi na espacio.

Robert a bolbe Aruba y den añanan final di decada 80 a forma su **Robert y su Solo Banda Show**. Mescos cu banda hopi banda, e Solo Banda Show di Robert a cuminsa gatea den club **Blue Wave** y cu awe ta e unico orquesta completo di nos isla y cu nunca a dreña den direccion di electronica y computadora den su banda.